

2 Petoro Petoroŋe ekap betŋan kulemguop.

O bukulpine,

¹ Nâmâ Simon Petoro. Yesu Kiristoŋe aposolo âi sâŋ nihimu mem hoŋ bawanŋim manmâ gan. Anitâŋe Yesu Kiristohât aposololipŋe nengât biwinenŋe mem hewewenŋe tuhumu Kiristohâlen biwinenŋaŋe kepeim manmain. Otmu yakât dopŋeâk yengât biwiyenŋe mem hewewenŋe tuhumu yâkâlen biwiyenŋaŋe kepeim manmai. Anitâ yet Yesu Kiristo dopyetŋe konohâk. Yakât otmâ Kiristoŋe lohimbî âlâhât nâŋgâmu yahatmu âlâhât nâŋgâmu gemu yawu ki otmap. Yâkŋe lohimbî hârok ârândânâk wawaenenekmap.

² Awoŋnenŋe Anitâ otmu Kutdânenŋe Yesu Kiristoŋe engatyetŋeâk otmâ nâŋgâyinŋim tihityenŋe otmawot. Yawu otmawot yakât yâk yetgâlen biwiyenŋaŋe kepeim denyetŋe lâum manmâ gai. Otmu yawuâk torokatmâ manŋetâ biwi nâŋgân nâŋgânyenŋaŋe kepeiakmâ konohâk otmâ sânduk sâŋ yâhâwuapgât nâŋgâm Anitâ ulitgum gaman.

Kiristohâlen biwinenŋaŋe kepeim kârihem mannom.

³⁻⁴ Anitâ yahat yahatŋe, Wâtgât Ambonŋaŋe menenekmâ ikŋe laŋinŋan katnenekmu orowâk mannongât pat kuningiop. Yakât otmâ Yesu Kiristoŋe âwurem ge menenekmâ himbimân yâhâ manman âilonŋoân katnenekmu mannom. Yakât nâŋgâmunŋe âlâ kândâkdâ otmap. Otmu nenŋe yâkâlen biwinenŋaŋe kepeim tem lâuwânŋim

manmunje māmāje otningimu târârâhâk manmain. Otmu yawuâk torokatmâ manmâ yâhâmunje nenekmu ârândâj otmu Kiristone âwurem ge menenekbuap. Sâp yan Hiliwaho Hiliwaho Amboņaje âlâkuâk biwinenņan kionmu ekņâleangim otmâ hilipgunomgât dop ki tetewuap. Yawu otmâ Anitâje mem koko salek tuhunenekmu yetje orowâk Kiristo orop biwinenņaje kepeiakmâ konohâk otmu manman âilonņoân manmâ yâhâmbisâin. ⁵ Yakât nâņgâm Kiristohâlen biwiyenņaje tiņâk kepeim manmanyenje kelihakmu kârihem mannomai. Yawu manņetâ wuân me wuân teteyiņgiwuap yan girawu otņetâ Anitâje yekmu ârândâj otbuapgât nâņgâņetâ keterakiņgiwuap. ⁶ Otmu nâņgâņetâ keterakiņgiwuap yakât kakņan otņetâ bâlemapgât biwiyenje galemahom mannomai. Yawu manņetâ lohimbi belângen manmainje senyenņan genomai me otmain yawuâk otņet sâm eņgatyenņan genomai. Yawu otņetâ Kiristohâlen biwiyenņaje tiņâk kepeim Anitâhât tem lâuwanņim uwawapņe bia manmâ ki lohotņe otnomai. ⁷ Yawu otmâ Kiristohât lohimbi orop biwiyenņaje kepeiakmâ konohâk otmu tânahom mannomai. Otmu lohimbi kerek buku otyiņgim manmâ yâhânomai. ⁸ Den sâm aran yu tâņ tâņâk watmâ Kiristohât tem lâuwanņiņetâ manman âlepņahât bulâje topņe topņe yengâlen tetem hengenņuwuap. Yawu otmu Kutdânenņe Yesu Kiristohât biwiņan girawu tatmap ya nâņgânomai. ⁹ Yâhâ Kiristone tosayenņahât otmâ mumu Anitâje tosayenje pilâyiņgiop yakât ikņe lohimbi nombotņaje

biwi nângân nângânyene manguakmu gulip malap manmai. Yawu manmâ den sâm aran yu nângânetâ gemu bet pilâm girawu mannetâ Anitâne yekmu ârândâŋ otbuap yakât ki nângâm manmai.

¹⁰ Yâhâ yenâmâ Anitâne dâiyekmu Wâtgât mâmâŋahât Heakne mem hewewen tuhuyekmu yâkâlen biwiyene katnetâ nine nanne baratne sâm meyekmâ manman kârikŋahât pat kuyiŋgiop. Pat yakât bulâne biatyinŋimapgât yâkâlen biwiyenane tiŋâk kepeim yu ya otjetgât den ekyongoan yu watmâ manmâ yâhânomai. Yawu manmâ ki otmâ tâpikgum Kiristohât mâtâp pilâm mâtâp bâlenan arinomai. ¹¹ Otmu sâp patoen Anitâne biwiyene ekmâ matne kâpekyiŋgiwuap yan Kutdânenne Yesu Kiristone âwurem ge sârereyekmu Anitâne manman kârikŋan katyekmu herone kakŋan manmâ yâhâmbisâi.

Petoroŋe mum pilâyekbuapgât sâop.

¹² Den ekyongoan yu emelâk aposololipne lok nombotne orop yen kâsikum yinŋimunnene nângânetâ bulâne otmu biwiyenân katmâ nângâm gai ya nanŋan. Yawu gârâmâ den yu nângâm mem mete tuhum mannomaihât ekyongom yâhâwom. ¹³⁻¹⁴ Aiop sâp ki kâlep otmuâk mum pilâyekbom yakât emelâk Kutdânenne Yesu Kiristone eknohop. Yakât otmâ inânŋan den ekyongoan yu nângâm biwiyenân katmâ nângâmâk mannetgât biwiyenân kionmâ yâhâwom. Yakât nângâmune ârândâŋ otmap. ¹⁵ Otmu pilâyekbom yakât kakŋan den kulemgum katyiŋgian yu sâlikum nângâm mem mete tuhum mannomai.

Anitâñe Yesu kun kundenñe mem âlâ tuhumu ekbi yakât Petoroñe sâop.

16 Kutdânennñe Yesu Kiristonñe âwurem gewuap yan wâtñe pato tetemu ekmunñe âlâ kândâkdâ otbuap yakât den emelâk kâsikum yingiwîn. Den kâsikum yingiwîn yamâ lokgât nângân nângân ki watmâ den golâ kâsikum yingiwîn. Nennñe yâk orop manmâ yâkñe olop miop ya ekmunñe âlâ kândâkdâ otmu Anitâ orop dopyetñe konohâk oap yawu nângâwin. ¹⁷⁻¹⁸ Nennñe yâk orowâk pumñe âlâen yâhâwin yan âwâñe Anitâñe yâkât nângâmu yahatmu kulem âlâ yuwu mem ekmunñe âlâ kândâkdâ olop. Anitâñe Kiristohât kun kundenñe mem âlâ tuhumu senñe emetsenñe pilâmu irik irik sâmâp yawuya tetemu ekbin. Otmu sângumñeâmâ kaok bolañ bolañ otmu ekbin. Yawu otmu Anitâ yahat yahatñe, Lanjinnahât Amboñe yuwu sâop. “Bulânânâk yuâmâ nine nanne ombe bisine. Nâñe biwinañe yâkâlâk nângâman.” Anitâñe himbimâmbâ den yawu sâmu nângâwin.

19 Otmu embânñan emet inânñan Anitâñe poropetelipñe den âlâlâ ekyongomu kulemguwi yakât bulâñe tetewuap nângâm engat yâhâp ki otmain. Otmu yeñe gurâ Anitâhât den tâñ tâñâk watnomaihât nângâm den âlâen hâum sâmune nângânñet. Kapi âlâen arine sâm otmâ omonñdâñe lambe saum ya lanjinnan mâtâp ekmâ arimain. Yâhâ emet hañ sâwe sâm otmap yanâmâ pitu kâmñe papato yañe tetemap. Yawu tetemu tatmâ yañak emet hañ sâmu emetsenñe ga takamap. Yakât dopñeâk Kiristonñe ki âwurem gemu mansain sâp yuâmâ Anitâhât den sâlikum

nângâmunje haŋ sâningimu Kiristohât mâtâp watmâ yâhânôm. Yâhâ âwurem gewuap yanâmâ ikne laŋinŋaŋe biwi nângân nângânnenŋan pilâmu Anitâ yet Kiristo yetgât biwiyetŋan âlâlâ tatmap ya topŋambâek nângânôm. ²⁰⁻²¹ Emelâk emet inânŋan Anitâhât poropeteliŋaŋe yâkât den kulemguwi yamâ yeŋe nângân nângân ki watmâ den ya kulemguwi. Wâtgât mâmâŋahât Heakŋe Anitâhât den biwiyenŋan katmu ya kulemguwi. Yakât otmâ lohimbi âlâ me âlâŋe yeŋe eŋgatyeneâk otmâ den ya sâm kusânâmâ bukulipyene ekyongonomaihât dop âlâ ki tap. Den yan yu biwiyenŋan katmâ nângâm mannomai.

2

Lok perâkŋe yeŋgât sâop.

¹ Emelâk Anitâhât poropeteliŋaŋe yâkât den Isirae lohimbi ekyongominiwi. Sâp yan lok perâkŋaŋe oain sâm oain sâm otmâ den perâkŋe kâityongominiwi. Yakât dopŋeâk lok perâkŋaŋe yeŋgâlen taka Kiristohât den kelanŋatmâ kâsikum yinŋinomai. Yâhâ Kiristoŋe yeŋe tosaŋhât otmâ kaweyenŋan kinmu kuŋetâ muop yakât nângâŋetâ tâŋhât otmu betgumai. Yakât otmâ hiliwahonomaihât pat mansai. ² Otmu Kiristohât den kelanŋatmâ kâsikum yinŋiŋetâ nângâŋetâ bulâŋe otmu lohimbi dondâŋe hionakmâ yâk yeŋgâlen torokatnomai. Yâk yeŋgâlen torokatnomai yan lohimbi belâŋgen manmaine manmanyene ekmâ sâm ge katyekmâ Kiristohât den pat nângâŋetâ gewuap. ³ Lok perâkŋaŋe yeŋgât iri sikumyene ekŋâlem meyiŋgine sâm den golâ ekyongonŋetâ

nângânetâ bulâne otmu tewetsenŋe yinginomai. Yawu otyinginomai yakât matŋe umatŋe yingimu menomaihât Anitâne sâp kalop. Sâp kalop ya ekmu ârândâŋ otmu matŋe yingimu mem hiliwahonomai.

⁴ Bulâŋanâk Anitâne matŋe umatŋe yingimu menomai yakât yuwu sâmune nângânet. Kândikum emelâk aŋelo nombotŋe Anitâhât den kum otmâ hilipguwi yakât matŋe nâpumân panyekmu ge omoŋ kâlehen tatmâ gai. Yawu tatmâ yâhânetâ sâp pato tetewuap yan den sâm hâreyingim matŋe umatŋe yingimu mem hiliwahonomai. ⁵ Otmu emelâk embâŋân lohimbiŋe Anitâ betgum orotmeme bâleŋe otmâ manminiwi. Yawu otmâ manŋetâ lok âlâ, kutŋe Noa sâm, lohimbiŋe Anitâhât den lâum manŋetâ yekmu ârândâŋ olâk sâm yâkŋe girem den ekyongominiop. Otmu girem den ya ekyongomu nângânetâ helekŋe otmu orotmeme bâleŋe tâtâem otŋetâ yaŋak Anitâne nângâmu tonŋelâk giop. Tonŋelâk gemu to niŋ niŋ sâm lohimbi bâleŋe ya asisihâk haranyongop. Yâhâ lohimbi nombolân yâhâp Noa orop waŋgaen yâhâ tatbi yawuâk hâmeyeŋe kinop.

⁶ Otmu kapi yâhâp, kutyetŋe Sotom yet Gomora, ya ambolipŋe gurâ Anitâhât hâkâŋ otmâ orotmeme bâleŋe otminiwi yakât matŋeamâ kâlâpŋe ge sem gulip tuhuyehop. Ya yengât den pat nângâmunŋe tetemap yan lohimbiŋe orotmeme bâleŋe otmai yakât Anitâne matŋe yingimu menomai nângâm engat yâhâp ki otmain. ⁷⁻⁸ Kâlâpŋe Sotom otmu Gomora kapi ambolipŋe sem gulip tuhuyehop yan Anitâne lok âlâ, kutŋe Lot sâm, yâkât nângâwaŋgimu hâmeŋe kinop yakât

yuwu sâmunne nângânet. Lotje Anitâhât tem lâuwanjim orotmeme âlepneâk otminiop yakât ekmu ârândân olop. Yâhâ kapi ambolipnaneâmâ Anitâhât den kum den bâlene sahanjim orotmeme bâlene hilâm ârândânâk otjetâ Lotje yekmu tepje dondâ bâleminiop. Yawu manopgât otmâ Anitâne nângâwanjimu hâmeje kinop.

9-10 Yakât dopneâk lohimbi Anitâhât tem lâuwanjim manmaine manman bâlenjahât panjonân kionmaihât meyekmâ manman âlepnan katyekmu manmai. Yâhâ lohimbi je Anitâhât den kum yeje engatyeneâk watmâ orotmeme bâlene ekñâlem otmai yakât matje umatje sâp patoen yinjimu menomai. Yakât otmâ hiliwahonomaihât pat kuyinjimu mansai.

Lok perâkne ya yengât wâtyeje pato ki tatyinjiap. Yawu gârâmâ yenhât nângânetâ yahatmu Anitâhât anelolipne ikne orop himbimân tatmai ya yengât nângânetâ gemu sâm bâleyinjimai. Yawu otmâ anelo yanje matje ningimai sâm yakât ki gorâyinjiap. ¹¹ Yâhâ Anitâhât anelolipne ya yengât wâtyeje pato tatyinjiap. Yawu tatyinjiap yamâ yâkât senñan kinmai yan anelo bukulipyene nombotñane otmâ hilipgunjetâ Anitâne betyongomu tatmai ya yengât ki sâm bâleyinjimai.

¹² Yâhâ lok perâkne ya yengât topyeje yuwu sâmunne nângânet. Anitâne sonjo bau otmu nâi selon topje topje katmu ekmain yamâ umut bi-wiyene bia. Otmu nenje hat ari kum taka um nenomgât sâm kalop. Yâhâ lok perâkñane yu yakât topje nângâm pâpgum ihilâk sâm bâlemai.

Yakât otmâ yekmunje biwiyenje bia mansai yawu otmap. Otmu sonjo bau kumain yakât dopneâk sâp patoen Anitâne lohimbi perâkne ya hilipy-ongowuap. ¹³ Yâkne lohimbi hâhiwin yinginetâ umatne kakņan manmâ gai. Yakât matne sâp patoen Anitâne yene gurâ yawuâk hâhiwin yingimu umatne kakņan mannomai. Otmu yâkne yuwu otņetâ dondâ bâlemap. Lohimbi senyenjan kinmâ yu ya ekņâlem otnehâlâk nâņgâm otmâ hilipgumai. Otmu yen menduhuakmâ sot nemai yan yengâlen torokatmâ to kârikne nem biwiyenje hâlim otmu otņetâ bâlemu anjun yingimai. ¹⁴ Otmu imbi âlâ me âlâ yekmai yan ya yengât nâņgâm biwiyenane otmâ tâpikgum tosa memai. Otmu orotmeme bâleje ya ekņâlem otnehâlâk nâņgâmai. Otmu lohimbi nombotņane biwi yâhâp manmai ya yengât enġatyenjan ġeņetâ otmâ tâpikgumai. Bukulipyenje yengât iri sikumyene miaknehâlâk nâņgâm mem lohotne tuhuyekmai. Yakât otmâ Anitâne matne umatne yingimu menomaihât pat kuyingimu mansai.

¹⁵ Yâkne Kiristohât mâtâp bulâne ya pilâm lok âlâ, kutne Bileam, Beoro nanne, yâkne olop yawuâk otmai. Yakât yuwu sâmune nâņgâņet. Bileamne hâmeņe membom nâņgâm Isirae lohimbi sait kakyeņan pilâwe sâm ariop. ¹⁶ Arimu Anitâhât anelo âlâne Bileamġât donġi lauņe mem purik pilâwaņgimu amboņe den ekuop. Den ekumu nâņgân nâņgânne keterakbaņgimu sait kakyeņan ki pilâop. Yawu.

¹⁷ To senne saņ kititiņ sâmap yapâ to ki osomain. Otmu elem kârikne mem emet mem maņgumap yamâ ġelâk ki ġemap. Yakât dopneâk lohimbiņe

lok perâkne yengât denyenê nângânetâ den yanê buku ki meyingimap. Yakât otmâ sâp patoen Anitâne lok perâkne ya pilâyekmu yaehen ge omoŋ bâlenaje sâhâyekmu tatnomai. ¹⁸ Yâkne yengahât nângânetâ yahatmu nângân nângân tângât lohimbî kâsikum yingimai yakât yâkne nângânetâ yahatmap. Otmu lohimbî nombotnaje pâku lohimbî yengâlebâ dâiakmâ Kiristohâlen biwiyenê katnetâ sâp ki kâlep oap. ¹⁹ Lohimbî yawuya yengât engatyenjan ge lok perâkne yuwu sâm ekyongomai. “Kiristone girem den yapâek holanjenekmu engatnenneâk watmâ yu ya otmâ mannomgât dop tap.” Yawu sâm engatyenjan genetâ orowâk otmâ tâpikgumai. Yawu otmâ Manman Bâlene Ambojahât paŋgojân yâhâpne kionmâ yâkât amutgen manmai. ²⁰ Yakât yuwu sâmune nângânet. Lohimbîne orotmeme bâlene bet pilâm Kutdânenne Yesu Kiristohâlen biwiyenaje kepeinetâ manman bâlenjahât paŋgojâmbâ holanyekmâ tihityenê otmap. Yawu gârâmâ orotmeme bâlene bet pilâwi ya miwirikum Manman Bâlene Ambojahât paŋgojân âlâkuâk kionmâ yâkât amutgen mannomai yanâmâ hiliwahonomaihât pat mannomai. Yawu mannomai yanâmâ emelâk Kiristohâlen biwiyenaje ki kepeiwi sâp yan tosayengahât matne menomai sâop ya wangim Anitâne matne amoknan yingimu menomai. ²¹ Lohimbî nombotnaje girawu mannetâ Anitâne yekmu ârândân otbuap yakât topne pâpgum orotmeme bâlene tâtâemâk otmâ belângen manmai. Lohimbî yawu yamâ Anitâne matne

yiŋgimu menomai. Yâhâ lohimbi nombotŋe âlâŋeâmâ Kiristohât den nâŋgâŋetâ bulâŋe otmu yâkâlen biwiyeŋaŋe kepeim manmai. Yawu otmai yakât kakŋan yâkât nâŋgâŋetâ gemu orotmeme bâleŋe miwirikum Kiristo betgunomai. Yawu otnomai yâhâmâ sâp patoen Anitâŋe lohimbi belâŋgen manmai matŋe yiŋgimu menomai ya wangim matŋe amokŋan yiŋgimu menomai. ²² Kiristo betgumai ya yengât nâŋgâm den âlâen hâum sâmain yakât nâŋgâmune bulâŋe oap. Den yamâ yuwu tap. Sosoŋe mohatmap yamâ benŋe yâhâpŋe nemap. Otmu bauŋe bokosohân dakakmap. Dakakmu hâkŋe bokosohâk pato otmap ya hârâŋ sâm bererek sâm gemu âlâkuâk ari bokosohân dakakmap. Yakât dopŋeâk lohimbi orotmeme bâleŋe aŋgoân otbi ya miwirikum otŋetâ dondâ bâlemap.

3

Bulâŋanâk Kiristoŋe âwurem ge menenekbuap.

¹ Bukulipne, yuwu sâmune nâŋgâŋet. Yeŋe girawu manŋetâ Anitâŋe yekmu ârândân otbuap yakât topŋe emelâk kâsikum yiŋgimune nâŋgâwi. Otmu yeŋe den ya nâŋgâm biwiyeŋan katmâ galemahom târârâhâk manŋetgât pepa âlâ kulemgum katyiŋgimune ekbi. Otmu yâhâpŋe yu kulemgum katyiŋgian. ² Emelâk Anitâŋe ikŋe poropetelipŋe den ekyongomu kulemgui. Otmu Kutdânennŋe Yesu Kiristo tihitnennŋe otmapŋe nen ikŋe aposololipŋe den eknongomu kâsikum yiŋgimunŋe nanŋai. Den ya kerehâk nâŋgâm heŋgeŋgum biwiyeŋan

katmâ manmâ yâhânomaihât yuwu sâmunenânġânet. ³ Sâp pato tâlâhuwuap yan lohimbi nombotņane yeņe engatyeneâk watmâ yu ya ekņâlem otmâ hilipgunomai. Yawu manmâ Kiristoņe âwurem ge menenekbuapgât sâop den yakât nânġânetâ bulâņe bia otmu yuwu sâm yengât senyenjan genomai. ⁴ “Kiristoņe “Âwurem ge meyekbom,” sâop yamâ nenņe ki eksain. Wosan taka tap ya sâņetâ ari ekne. Anitâņe hân himbim kândikyotgowâmbâek lohimbi nengât manmannenņe dop konohâk tatmâ gamap. Otmu tâmbâlipnenņe mum gara gara otbi yawuâk nen gurâ mumain.” Yawu sâm senyenjan genomai. ⁵ Yawu sâm senyenjan genomai yan Anitâhât den nânġânetâ gemu yeņe nânġân nânġân watmâ sânomai. Yakât yuwu sâmunenânġânet. Kândikum emelâk topņe katmâ Anitâņe sâmu biaembâ hân himbim teteop. Otmu saru keterakmu hân teteop. Otmu elem kulewonņoņ tetem yapâek gelâk gemap. Gelâk gemu yaņak nak me senņe âlâlâ topņe topņe tetem âi omoņ omoņ otmâ yahatmap. ⁶ Otmu lohimbiņe Anitâ betgum otņetâ bâleop yakât matņe yâkņe sâmu tonġelâk gemu to niņ niņ sâm lohimbi otmu senņe âlâlâ waņgaen ki yâhâwi ya aksisihâk haranyongop. ⁷ Otmu sâp pato tetewuawân Anitâņe sâmu hân himbim ekmain yu kâlâpņe sem gulip tuhuwuapgât sâm kalop. Sâp yan Anitâņe lohimbi kerek nengât biwinenņe ekmâ sâm hâreningiwuap. Yawu otmâ lohimbiņe yâkâlen biwiyenjan ki kepeimai yamâ matņe yingimu mem hiliwahonomai.

8-9 Otmu lohimbi nombotņane “Wongât Anitâņe

Kiristo in yawu ki hângângumu âwurem gemap?” yawu sâmai yakât yuwu sâmune nângâm biwiyenjan katjet. Anitâne sâpgât ki nângâmap. Yakât otmâ yambu 1000 yakât biwijnan yu ya tetemap yakât nângâmu hilâm konok biwijnan tetemap yawu otmap. Yamâ angoânâmâ lohimbiñe orotmeme bâleñe bet pilâm Kiristohâlen biwiyenjan katjetâ manman kârikjahât pat kuyiñgimu manñetgât nângâm mambotyñgimap.

¹⁰ Kutdânenñe âwurem gewuap yakât nângâñetâ keterakyiñgiâkgât den âlâen hâum sâmune nângâñet. Kapi ambolipñe yeñgât kasalipyenjan sâp girawuân taka itit kiom tuhuyiñginomai ya ki ekyongomai. Kapi ambolipñe ki nângâmâk manñetâ kasalipyenjan pârâk sânsânâk taka yongom kiom tuhuyiñgimai. Yakât dopñeâk Kiristoñe pârâk sânsânâk gewuap. Sâp yan kâlâp punduñ sâm himbimân emetsenñe pitu âlâlâ ya kerehâk munñe orowâk sem gulip tuhuwuap. Otmu hânân yu senñe âlâlâ topñe topñe yu gurâ yawuâk sem gulip tuhuwuap. ¹¹ Yakât nângâm yeñe manman bâleñambâ keterakmâ Anitâhât tem lâuwanjim târârâhâk mannomai. ¹²⁻¹³ Otmu Anitâne sâmu kâlâp pato punduñ sâm himbimân emetsenñe pitu otmu hânân senñe âlâlâ ya kerehâk sem gulip tuhuwuap. Yakât kakñan yâhâpñe sâmu hân himbim ango tetewuap. Hân himbim ango tetemu yan mem katyekmu koko salehâk manñetâ yekmu ârândân otbuap. Yakât pat emelâk kuyiñgimu tap. Yakât otmâ sâp pato tetemu Kiristoñe âwurem ge meyekbuap yakât nângâm biwi nângân nângânyenjan kilik kilik

sâmu mambotbanjim mannomai.

14 Yawu mambotbanjim mannomai yanâmâ Anitâne yekmâ “nine nanne baratne koko salek,” sâmu kaok nângâyîngiwuap. Yakât nângâm Kiristohâlen biwiyenane tinâk kepeim manmanyene kelihakmu kârihem mannomai.

15 Otmu Anitâne Kiristo in yawu ki hângângumu âwurem gewuap. Otmu ki âwurem gewuap yan lohimbiye yâkâlen biwiyenane kepeinetâ Anitâne tosayene pilâyîngiwuapgât mâtâp ki hâreakmâ tân sâwuap. Yakât nângâm “Wongât Anitâne in yawu ki hângângumu gemap?” yene yawu ki sânomai. Den yan yuñe Paulone den kulemgum katyîngimu ekbi ya miap. Yakât yuwu sâmune nângânet. Anitâhât biwiñan nângân nângân âlâlâ tatmap ya Wâtgât mâmâñahât Heakne mem bukunenñe Paulo yâkât biwiñan katmu yâkne kulemgum katyîngimu ekbi. 16 Paulone ekap âlâlâ katyîngiop yan den yuwuâk kulemgum katyîngiop. Yawu gârâmâ den kulemgum katyîngiop ya lohimbi nombotñane sâlikum nângânetâ ki keterakyîngimu nângân nângânyene hâlim milim otmap. Yakât otmâ den ya kelanğatmâ bukulipyene kâsikum yîngimai. Yawu gârâmâ emelâk Anitâhât poropetelipne otmu lok nombotñane yâkât den kulemguwî ya yâkñak yawuâk kelanğatmâ bukulipyene kâsikum yîngimai. Yakât otmâ yenahâk otmâ tâpikgum hiliwahonomaihât pat mansai.

17 Den yu emet inânñan ekyongoan. Lok nombotñane Anitâhât den kum yene enğatyeneâk watmai. Lok yawuyane yengâlen taka enğatyenñan genetâ nângân nângânyene hâlim milim otmu

manman bâlenjahât paŋgoŋân kionmaihât biwiyenje galemahom mannomai. ¹⁸ Otmu sâp yiwerenje yuâmâ Kutdânenŋe Yesu Kiristohâlen biwiyenŋe kepeim manmai ya wangim yâkâlen biwiyenŋe tiŋâk kepeim yâkât den tiŋâk lâum mannomai. Yawu otnomai yanâmâ yâkŋe tihityenje otmu manman âlepŋahât bulâŋe yenġâlen teteap ya wangim bulâŋe topŋe topŋe teteyiŋgiwuap. Yakât nâŋgâm Kiristo mepaem manmâ yâhâmbisâin. Ya bonŋanâk.

Nâ bukuyenje,
Petoro

Yesuât Den Pat Âlepŋe
The New Testament in the Selepet Language of Papua
New Guinea
Nupela Testamen long tokples Selepet long Niugini

copyright © 1986 Wycliffe Bible Translators, Inc.

Language: Selepet

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 22 Feb 2024 from source files dated 31 Aug 2023

995083d2-705e-5a60-af47-1e36806ccbc